



BOLETIN



PROVEDORIA DOS DIREITOS HUMANOS E JUSTIÇA (PDHJ)



**PROMOVE NO PROTEJE DIREITOS HUMANOS
NO PROMOVE GOVERNACAO DI'AK**

PDHJ Públika Rejultadu Inisiu Monitorizasaun Ba Implementasaun Projetu Alargamentu Estrada no Irigasaun Barazen Tono Iha RAEOA

Dili- iha loron 30 Maiu 2016, Provedoria dos Direitos Humanos e Justiça (PDHJ) pública rejultadu inisiu monitorizasaun Direitus Umanus no Governasaun Di'ak, relasiona ho projetu Zona Especial Economia Social no Merkadu (ZEESM), refere liu ba “Impaktu, Projetu Alargamentu Estrada no Projetu Irigasaun no Barazen Tono ba Komunidade”



Provedor, Dr. Silverio Pinto Baptista, akompaña husi Adjunta Provedor Governasaun Di'ak, Representante Presidente Autoridade ZEESM no Representante Chefe Casa Civil Presidente Repúblika no Oficial Monitoring PDHJ, hatudu hela relatoriu rejultadu monitorizasaun ba implementasaun projetu Alargamentu Estrada no Irigasaun no Barazen Tono iha RAEOE

Provedor, Dr. Silverio Pinto Baptista iha konferensia ba imprensa hateten katak, atividade monitorizasaun ne'e hala'o iha Rejiaun Especial Autonomo Oecusse Ambeno (RAEOA), hahu husi loron 11 to'o 18 Novembru 2015, foka ba Postu Administrativu Pante Makasar, Suku Costa, Nipane, Cunha no Lalisuk. Husi Suku haat (4) ne'e, PDHJ konsege entrevista beneficiariu hamutuk 93 kompostu husi feto 38 no mane 55.

Objetivu husi monitorizasaun PDHJ nian, relasiona ho preokupasaun no aspirasaun komunidade sira nian ba prosesu dezvoltamentu ZEESM nian liu-liu direitu ekonomia, sosial no kulturais

no mós hakat advokasia ba propoin enkuadramentu estratéjiku ida hodi hala'o pasu sira bá oin liga ho direitu ekonomiku sosial no kulturais.

Provedor esplika katak, husi monitorizasaun no depois halo audiensia públiku ho autoridades no comunidades iha rejultadu hatudu katak;

Isu Alargamentu Estrada;

1. PDHJ identifika iha distribuisaun material hirak ne'e laiha kualidade ex. Rai henek kahur ho Rai tahu, ai hodi hari'i uma dodok ka a'at, fatuk ki'ik la merese halo uma.
2. PDHJ identifika katak laiha akompanhamentu ka monitoriza husi autoridades wainhira distribui material konstrusaun
3. PDHJ identifika iha comunidade nia kios balun hetan sobu tiha ona maibe Governu seidauk fó matériel konstrusaun
4. PDHJ identifika laiha jestaun ne'ebe diak hodi jere osan ba badaen sira no ikus mai rezulta osan ba badaen la suficiente
5. PDHJ identifika falta informasaun husi Governu ba comunidade sira liu hosi dialogu ne'ebe la involve ema hotu - hotu
6. PDHJ identifika katak Governu la iha konsiderasaun hodi hari'i uluk uma ba comunidade depois maka sobu comunidade nia uma ne'ebé afeta husi Projetu
7. PDHJ nota katak Governu presiza hare fila fali kestaun rai privadu tanba iha Oecusse comunidade ne'ebé maka sira nia uma no rai hetan afeta husi alargamentu Estrada Governu so rekompensa deit ba uma maibe rai lae.
8. Identifika comunidade balun ne'ebe afetadu la hetan rai alternativu seluk hodi hari'i fali uma foun
9. Estrada ateru ona maibe be dalan laiha tanba ne'e mak be sulin tama fali ba comunidade nia uma wainhira udan.

Isu Barazen Tono;

1. PDHJ identifika katak, comunidade afetadu balun lahetan oportunidade hodi servisu iha Projetu Konstrusaun Barazen Tono.
2. PDHJ mos nota katak rezultadu husi diálogo to'o agora la iha implementasaun.
3. Involvimentu iha diálogo la iha partisipasaun máximu husi comunidade afetadu.
4. Comunidade afetadu tenki muda profisaun husi Agrikultór ba fali profisaun seluk ne'ebé foun ba sira hodi sustenta nesesidade uma laran. Lori tempu ba adaptasaun ho profisaun foun.

AUTORIDADE ZEESM

Rekomendasaun Isu Alargamentu Estrada

1. Atu kompleta lalais matérial konstrusaun ne'ebé mak sei falta
2. Halo analiza/hare fila fali orsamentu ba badaen, tamba ho mega projetu iha Oecusse fó mós impaktu ba folin badaen lokal sira.
3. Atu kria uluk kondisaun ne'ebé adekuaudu ka halo uluk uma ba comunidade afetadu sira antes sobu sira nia uma.
4. Atu monitora no kontrola distribuisaun matérial sira no fa sansaun ba kompania sira ne'ebé maka halo distribusaun matérial tarde no mós distribui matérial la iha kualidade.
5. Presiza haklean informasaun ne'ebé lolos ba comunidade sira tantu sira ne'ebe uma sobu ona ka seidauk sobu.
6. Atu sobu comunidade nia uma presiza halo tuir standar prosesu eviksaun nian ne'ebé maka konsidera hakat 3 hanesan antes, durante no depois eviksaun.

Rekomendasaun Isu Barazen Tono

1. Presiza iha estudu viabilidade antes implementasaun projetu barajen tono, tamba projetu ne'e fó impaktu ba menus ai han no vida ekonomia iha comunidade.
2. Atu kontrola folin (*nesesidade baziku*) iha merkadu wainhira taka Irigasaun Tono
3. Atu fó subsidiu ba afetadu sira hodi bele sustenta moris iha tempu ne'ebé projetu barazen Tono sei iha konstrusaun nia laran, liu husi dados Suco nian.
4. Atu identifika afetadus ne'ebé bele iha oportunidade servisu iha projetu atu nuneé hetan rendimentu sustenta família.
5. Autoridade ZEESM presiza tau iha planu OGE 2017 hodi bele sosa fali produtu hirak ne'e no hodi halo Manutensaun ba Irigasaun.
6. Presiza kria koperativa ne'ebé mak tau asuntu ba variadade ai-han relasiona ho produsaun ne'ebé comunidade sira planta, Ez. Fore-munggu, Fore-rai, fore-tali no seluk tan.
7. Presiza iha Planu Mestri hanesan baze fundamentu ba projetu hotu iha Oecusse.
8. Husu ba Autoridade ZEESM katak presiza iha Planu sosializasaun regular ba comunidade Oecusse tomak hodi hasae sira nia konsiensia kona ba “sira maka nain ba konstrusaun sira ne'e atu nuneé sira bele kontribui no partisipa iha prosesu dezvoltamentu”.
9. Iha oportunidade ne'e PDHJ mós hakarak hatu'o katak Komunitade afetadu hakarak halo Dialogo ho Autoridade ZEESM ne'ebé fasilita husi PDHJ.

PARLAMENTU NASIONAL

1. Uza kompetensia tuir konstituisaun RDTL artigu 95 hodi halo fiskalizasaun ba impaktu implementasaun Projetu ZEESM nian, Parlamentu Nasional hanesan representante povu atu husu Autoridade ZEESM esplika kona ba progresu no dezafiu husi implementasaun Projetu ZEESM nian iha Parlamentu Nasional.
2. Husu ba Parlamentu Nasional liu husi Membru Deputadu sira, wainhira tun ba terrenu hodi halo konsolidasaun Partidu Politika nian, presiza mos halo sensibilizasaun ba militante sira katak projetu sira ne'e ho alokasaun orsamentu ne'ebé ho kustu bo'ot, atu nuneé sira sente katak kontrusaun sira ne'e presiza iha retornu hodi hetan sustentabilidade husi projetu hirak ne'e no bele asegura benefisiu husi projetu fiziku hirak ne'e no mos ba povu tomak.

PDHJ Selebra Loron Aniversariu Ba Dala -12

Dili- Iha loron 25 Maiu 2016, Familia bo'ot Instituisaun Provedoria dos Direitos Humanos e Justiça (PDHJ) hamutuk ho membrus Konsehu Konsultivu no parseiru servisu selebra loron aniversariu ba dala 12, iha Salaun Ministério Solidariedade Social (MSS) Caicoli-Dili.



Foto hamutuk membrus Konsehu Konsultivu, depios simu tomada de posse iha selebrasaun loron aniversariu PDHJ ba dala 12, ne'ebé realiza iha Salaun Ministério Solidariedade Social-Caicoli-Dili

Provedor Dr. Silverio Pinto Baptista hateten katak, juridikamente PDHJ ezisti ona durante tinan 12, maibé atividades normalmente hala'o durante tinan 10 nia laran hahu husi PDHJ loke odamatan ba publiku iha loron 24 Marsu 2006 hodi hahu ho simu keixas husi públiku. Ha'u sente orgullu hanesan Provedor Direitus Umanus no Justisa ba periodu datoluk depois de periodu primeiru no segundu Dr. Sebastião Dias Ximenes maka sai hanesan Provedor no Adjuntus iha mandatu Primeiru maka Dr. Amandio de Sa Benevides no segundu mandatu Dr. Rui Pereira dos Santos no atan ha'u rasik hanesan Provedor Adjuntu ba area direitus umanus iha periodu primeiru no segundu husi Fulan Juñu 2005 to'o Fulan Outubru 2014. Durante tinan 12 ona PDHJ nia ezistensia foin ba dahuluk ita bele hamutuk hodi selebra loron aniversariu PDHJ nian.

Iha selebrasaun aniversariu PDHJ nian ba dala uluk ne'e, Provedor fó tomada de posse ba membru Konsehu Konsultivu ba Provedoria dos Direitos Humanos e Justiça. Bazeia ba Dekretu

Lei Nú 25/2011, Órgânico husi PDHJ Artigu 17 defini katak, Konselhu Konsultivu sai nu'udar órgaun koletivu konsulta nian, ho nia misaun maka atu halo balansu periódiku ba atividades husi PDHJ liu husi sosiedade sivil sira nia partisipasaun tomak.

Ezistencia Provedoria dos Direitos Humanos e Justiça ho baze iha Artigu 27, Artigu 150 no 151 Konstituisaun RDTL no mos dever legal PDHJ nian ne'ebé hatúr ona iha Estatutu PDHJ Lei Nú 7/2004. PDHJ iha mandatu rua hodi hala'o maka promove no protege direitos umanus no promove governasaun di'ak.

PDHJ nia vizaun maka proteje direitos umanus, hametin integridade no promove governasaun di'ak iha Timor-Leste. PDHJ nia Misaun maka nuudár institusaun nasional direitos umanus Timor-Leste nian, órgaun independente ne'ebé harí atu proteje, promove direitos umanus no governasaun di'ak.

PDHJ nia mandatu maka promove no protege direitos umanus no promove governasaun di'ak nune'e atividades ne'ebé PDHJ hala'o regularmente mak simu keixas husi comunidade ka públiku no keixas ho inisiativa Provedor, halo investigasaun, promosaun, edukasaun, monitorizasaun, advokasia, mediasaun no konsiliaaun, hato'o rekomendasaun ba governu no instituisaun Publika sira. PDHJ mos hala'o atividade adisional tuir nesesidade no competência no mos servisu ka atividades ho âmbito nacional no internacional iha área rua refere.

Hanesan Instituisaun Estadu nian, PDHJ nia estrutura organika maka hanesan, iha parte politika PDHJ iha Provedor ema nain 1, adjuntu provedor iha ema nain 2, ida-idak nia area servisu maka adjunta Provedora ba area governasaun di'ak no adjuntu Provedor ba area direitos umanus. Enkuantu iha parte teknika PDHJ iha Diretor Geral ema nain 1, Diretor Nacional ema nain 4, feto 1 mane ema nain 3, Diretor Delegasaun Territorial iha ema nain 4, feto ema nain 1 no mane ema nain 3. Enkuantu Xefi Departamentu iha ema nain 16, feto ema nain 7 no mane ema nain 9 no funsionariu husi nivel tekniku superior to'o assistente hamutuk ema nain 71. Nune'e total funsionariu permanente ne'ebé maka oras ne'e servisu iha PDHJ iha Sede sentral to'o Delegasaun Territorial sira hamutuk ema nain 95, mane ema nain 53 no feto ema nain 42.

PDHJ hanesan Instituisaun Estadu ne'ebe Independente, hala'o nia kna'ar, la haree ba kor, rasa, ideologia politika, relijiaun, sexo no generu. PDHJ halo atendentu ba publiku liu husi prinsipiu direitos umanus no governasaun di'ak. Atu atinji prinsipius hirak ne'e, hahu iha tinan 2009 PDHJ establese ona sede regional 4 maka hanesan Delegasaun Territorial iha Baucau, Same, Maliana no Oecusse. Delegasaun Territorial ida-idak nia area kompetensia servisu maka hanesan Delegasaun Territorial Baucau area servisu kobre iha Munisipiu Baucau, Manatutu, Viqueque no Lautem. Delegasaun Territorial Same kobre Munisipiu Aileu, Ainaro no Manufahi. Delegasaun Territorial Maliana nia area kompetensia servisu maka Munisipiu Bobonaro, Covalima, Ermera no Delegasaun Territorial Oe-Cusse nia area kompetensia servisu maka Regiaun Especial Administrativa Oecusse Ambeno (RAEOA).

Bazeia ba planu estratejia PDHJ 2011-2020, iha prioridades 4 maka PDHJ define hanesan, autoridade Públika sira iha kuñesimentu di'ak kona ba direitos umanus no governasaun di'ak iha sira nia kuadru institucional. PDHJ promove katak autoridade sira halo prevensaun no korresaun ba violasaun ba prinsipiu direitos umanus no boa governasaun nian. Ema vulneravel sira iha protesasaun hasoru abuzu direitos umanus no bele hetan asesu diak ba atendentu públiku. PDHJ asegura kapasidade, independénsia hodi garante bele implementa mandatu ho diak. Estratejia

ne'e PDHJ implementa liu husi atividades regular maka hanesan simu keixas, investigasaun, monitorizasaun, promosaun no edukasaun no mediasaun no konsiliaaun.

Desde PDHJ loke nia odamatan ba públiku iha Loron 24 Fulan Marsu 2006 to'o iha Maiu 2016 PDHJ simu keixas husi comunidades no inisiativa Provedor hamutuk 2.335. Husi total keixas ne'e maioria keixas ho total 1.342 kona-ba indikasaun administrasaun la di'ak, keixas 894 kona-ba indikasaun violasaun direitos umanus no keixas hamutuk 99 kona-ba indikasaun korupsaun.

Enkuantu iha parte fiskalizasaun no monitorizasaun PDHJ hala'o monitorizasaun ba projetu sira maka governu hala'o no mos hala'o monitorizasaun regular iha sela detensaun no prizaun sira no mos halo monitorizasaun ba isu insidental hanesan issu direitu ekonomia sosial no kultura hanesan saúde edukasaun no seluk tan. Hala'o mos monitorizasaun ba situasaun direitos umanus hanesan iha krize poltika no militar 2006, eleisaun presidencial no parlamentar ne'ebé hala'o iha Timor Leste, eviksaun husi governu ba comunidade sira inklui issu insidental seluk maka iha relasaun ho mandatu PDHJ.

PDHJ hala'o mos atividades promosaun no edukasaun hanesan fó treinamentu ba membrus PNTL, F-FDTL, Guarda Prizaun, Lideransa Komunitaria inklui sosializasaun ba estudante sira husi ensino Secundaria to'o Universitariu. Nune'e mos PDHJ halo mediasaun no konsiliaaun ba kazus maka iha indikasaun violasaun direitos umanus no administrasaun la di'ak.

Durante ne'e iha ona rezultadu no mos impaktu signifikante husi atividade sira ne'ebé PDHJ hala'o ona. Ezemplu husi total keixas 2.335 bazeia ba rejultadu investigasaun PDHJ finaliza ona kazu ho total 167 kona-ba violasaun administrasaun la di'ak no kazu hamutuk 383 kona-ba violasaun direitos umanus no rekomenda ona ba Ministeriu no Instituisaun relevantes hodi implementa tuir sira nia kompetencias. Enkuantu kazu kona-ba krime PDHJ hato'o ba Ministeriu Públiku hodi kontinua halo prosesu no kazus ne'ebé iha indikasaun korupsaun hato'o ona ba Comissão Anti Corupção (CAC) hodi kontinua hala'o prosesu.

Iha parte promosaun PDHJ hahu husi tinan 2008 fó ona premio direitos umanus ba komandu PNTL sira husi Munisipiu sira hanesan Ainaro, Covalima, Manatutu, Lautem, Manufahi, Liquiça no Regiaun Espesial Administrativa Oecusse Ambeno (REAOA). Premiu direitos umanus refere PDHJ fó ba komandatu PNTL ne'ebé temi iha leten ho kriteira maka durante tinan ida nia laran bazeia ba baze de dados PDHJ hatudu katak laiha keixas husi comunidade sira hasoru Komandu PNTL sira. Ho premio direitos umanus nu'udar meius ida hodi fó motivasaun ba membrus PNTL sira hodi bele hala'o knaar tuir lei no ordem maka vigora iha Timor Leste.

Durante iha periodu servisu tinan 10 nia laran hahu husi lideransa Provedor sesante Dr. Sebastião Dias Ximenes nia mandatu no to'o oras ne'e PDHJ hala'o ona servisu hamutuk iha nivel nasional maka ho Parlamentu Nasional no Governu mak hanesan Ministeriu Solidaridade Sosial (MSS), Ministeriu Edukasaun, Ministeriu Administrasaun Estatal (MAE), Ministeriu Justisa no Ministeriu Saúde.

Enkuantu kooperasaun ho instituisaun estadu maka hanesan Komandu Geral PNTL liu husi Sentru Formasaun PNTL hodi elabora manual direitos umanus ba kadetes membru PNTL no fasilita nafatin treinamentu direitos umanus atu bele kapasita membru PNTL, hodi nune'e membrus PNTL bele hala'o knaar tuir Lei no Ordem, respeita direitos umanus no hala'o knaar tuir prinsípios governasaun di'ak no kooperasaun ho F-FDTL hodi realiza atividade promosaun.

PDHJ mos iha akordu kooperasaun servisu ho CAC, Komisaun Funsan Públika, Inspesaun Geral do Estado hodi realiza treinamentu hamutuk ba funsionariu públiku sira, membrus PNTL no F-FDTL.

Iha parte sosiadade sivil PDHJ servisu hamutuk ho Assosiasaun HAK, Fundasaun Mahein, Luta Hamutuk, Belun, Fundasaun Haburas, Fokupers no mos NGO sira seluk iha nivel Kapital Nasaun RDTL no mos iha Nivel Munisipiu sira. Iha tempu krize 2006 PDHJ servisu hamutuk ho NGO sira hodi estabese Join Monitoring Team (JMT) hodi halo monitorizasaun hamutuk ba situasaun direitus umanus iha Timor Leste liu-liu ba situasaun IDPs sira iha Dili no mos iha Distritu sira iha momentu ne'ebá.

La'os ne'e de'it iha nivel internasional PDHJ hala'o ho KOMNAS HAM Indonesia hodi haré ba asuntu fronteira no mos labarik ne'ebé separa ho sira-nia familia durante konflitu politika hahu iha 1975-1999. Akordu kooperasaun entre PDHJ no KOMNAS HAM Indonesia nia asaun konkreta maka iha tinan 2015 no 2016 realiza reunifikasaun entre labarik hirak ne'ebé separa ho sira nia familia durante konflitu politika 1975-1999 ho sira-nia familia no dialogu entre Estadu Timor Leste ho labarik maka separa ho sira-nia familia nune'e tuir dadus ne'ebé iha katak tinan 2015 ema nain 14 no iha Maiu 2016 ema nain 12. Sesaun dialogu refere bele implementa duni tanba servisu no esforsu makaas husi ekipa umanitaria ne'ebé kompostu husi PDHJ, Gabinete Primeiru Ministru, MSS, ICRC, CVTL, AJAR-TL, Fundasaun Alola, ACbit no Assosiasaun HAK. Ekipa ne'e mos iha kooperasaun diak ho ekipa umanitaria iha Jakarta-Indonesia ne'ebe kompostu husi KOMNAS HAM Indonesia, AJAR Jakarta, KONTRAS no IKOHI nune'e regularmente hala'o koordenasaun hodi buka tuir no identifika labarik Timor oan nebe lakon komunikaun ho familia sira iha tempu naruk nia laran. Esforsu hirak ne'e nu'udar asaun umanitaria konkreta hodi implementa komitementu Estadu TL no Estadu Indonesia tuir rekomendasaun balun husi Comisaun Verdade no Amizade (CVA) relasiona ho Establesementu Komisaun ba buka ema lakon.

PDHJ mos halo kooperasaun ho ajensia internasional, nune'e iha tinan 2014 PDHJ hetan tulun finanseiru husi Povtu Amerikanu liu husi Estados Unidos nia Ajensia ba Dezenvolvimentu Internasional USAID iha Timor-Leste. Iha momentu ne'ebá programa refere nu'udar projetu pilotu ho durasaun fulan 18 no primeira vez aplika iha Timor Leste ho benefisiariu maka PDHJ hodi dezeña atu reforsa descentalizasaun no desenvolve instituisaun hodi promove no proteje direitus umanus no promove governasaun di'ak iha Timor-Leste.

Programa refere ho naran G2G ka Programa entre Governo Timor-Leste ho Governo Estados Unidos Américano no iha tinan 2016 PDHJ sai nafatin benefisiariu ba programa refere.

PDHJ sai ona membru permanente ba Instituisaun Direitos Humanos Asia Pacific Forum (APF), membru permanente ba International Coordinating Committee (ICC) hahu iha tinan 2008 nune'e mos PDHJ re-akredita fila fali iha tinan 2013 ho estatutu A bazeia ba rezultadu servisu PDHJ nian. Ba kooperasaun ho instituisoens internacionais, PDHJ tenta no buka atu kontinua hametin relasaun no kooperasaun di'ak ho instituisaun hotu-hotu ne'ebé iha kna'ar no mandatu hanesan PDHJ nian. Nune'e, agora daudaun PDHJ iha kooperasaun di'ak ho Instituisaun Nasional Direitos Humanos iha regiaun ASEAN, ne'ebé PDHJ integra ba Forum Instituisaun Nasional Direitos Humanos ASEAN. PDHJ mos iha kooperasaun di'ak ho membrus Instituisaun Nasional Direitos Humanos Asia Pasifiku Forum (APF) ne'ebé PDHJ mos sai membru. PDHJ mos iha kooperasaun di'ak ho membrus Instituisaun Nasional Direitos Humanos Mundu tomak ne'ebé

integra-an iha ICC ka International Coordinating Committee ne'ebé PDHJ sai membru ho estatutu "A".

Hanesan Instituisaun Nasional Direitus Umanus ne'ebé hetan Akreditasaun "A" iha tinan 2008 husi ICC, hafoin tinan 5, iha nia dever hodi submete ba prosesu re-akreditasaun iha tinan 2013, tuir regras no mekanismu internasional. Nune'e iha fulan Novembru 2013, PDHJ hetan fila fali re-akreditasaun, nafatin ho estatuto A. Ida ne'e urgullu ba Estadu Timor-Leste tanba hatudu katak PDHJ esforsa-an hodi hametin nafatin nia komitmentu servisu ne'ebé di'ak tuir padrão no prinsipiu legal no mekanismu internasional sira maka iha. PDHJ hanesan Instituisaun Estadu sente satisfeito ho re-akreditasaun ne'e tanba esforsu ne'ebé PDHJ halo durante ne'e hetan apresiasaun husi ICC maibé ho estatutu A husi ICC PDHJ iha responsabilidade boot hodi protégé no promove direitus umanus no promove governasaun di'ak iha Timor-Leste nune'e presiza tebes kontribuisaun husi parte hotu-hotu.

PDHJ mos sai membru Ombudsman Asia nian no mos iha kooperasaun di'ak ho membrus hotu-hotu, nune'e mos PDHJ hola parte iha Ombudsman Regiaun Australasian and Pacific Ombudsman. Timor-Leste hanesan nasaun ne'ebé koalia lian portuguê, PDHJ esforu maka'as hodi estabelese no hametin relasaun servisu hamutuk ho Provedores de Justiça no Comissões Nacionais de Direitos Humanos Países CPLP nian. Nune'e iha tinan 2013 PDHJ integra ona iha Rede de operação entre Instituições Nacionais de Direitos Humanos no Provedores da Justiça Países Membros CPLP nian, no iha tinan 2014, PDHJ mak lidera Rede de Cooperação refere.

Hanesan membru ICC, PDHJ submete tiha ona relatóriu monitorizasaun ba Agência relevantes Organizasaun Nasaun Unidas (ONU) nian iha Zenebra. Durante tinan 10 nia laran PDHJ submete tiha ona nia relatóriu sira hanesan, Universal Periodic Review (UPR) no komplementariu sira. Relatoriu UPR primeiru PDHJ hato'o iha tinan 2011 maibé hahu halo prosesu ba elaborasaun relatoriu iha tinan 2009. Iha momentu ne'ebá PDHJ servisu hamutuk ho NGO nasional hamutuk 55 hodi halo elaborasaun ba Universal Periodic Review (UPR) no relatoriu UPR ba dala rua PDHJ hato'o ba ONU iha tinan 2015. PDHJ mos hato'o relatoriu komplementariu Konvensaun kona-ba Direitu Labarik iha tinan 2015, Konvensaun kona-ba Halakon Forma Diskriminasaun Hotu-Hotu Hasoru Feto primeiru iha tinan 2009 no relatoriu ba daruak iha tinan 2015. PDHJ hato'o mos relatoriu Konvensaun Internasionál kona-ba Protesaun ba Direitu Traballadór Imigrante no sira-nia Família iha tinan 2015.

Ho maneira ida ne'e, PDHJ halo ona esforsu ne'ebé kontribui ona hodi hadia estandarte moris ba nia populasaun barak no halo sira viavel liu tanba comunidade internasional.

Mezmu nune'e PDHJ sempre posivel atu hadia-an no sei asegura katak PDHJ sei desenvolve di'ak liu tan iha futuro. Ha'u kontente no honradu hodi lidera instituisaun ne'ebe forte hanesan PDHJ dadauk ne'e. Ida ne'e mak rezultadu husi ambisaun, servisu maka'as no kapasidade husi ami nia funsionáriu sira ne'ebe motivadu los maibé kontribuisaun signifikantes sempre konta mos ema hotu nia kontribuisaun maske ki'ik no oituan maibé kontributivu hodi hadia PDHJ hodi asegura nafatin prinsipiu governasaun di'ak hodi tane a'as no dignifika ema hotu nia direitus umanus iha Timor Leste.

Kona-ba dezvoltamento institucional, PDHJ continua dezvoltave-an em termos de kapasitasaun rekursus umanus, ne'ebé sai nafatin programa prioridade ba instituisaun, nune'e funcionários sira bele iha kapasidade no habilidade naton atu hala'o sira nia kna'ar. Desde tinan

2010, PDHJ hetan apoio husi UNDP, servisu hamutuk ho OHCHR (Alto Comariado Nações Unidas ba Direitos Humanos) iha Genebra, no SIDA (Sueçia) no mos Governo Nova Zelândia, fasilita projetu ida hanaran “Human Rights Capacity Building” iha momentu ne’ebá ajuda no fó apoiu ba treinamentu no formasaun funsionáriu sira PDHJ nian iha rai laran nune’e pojetu refere remata iha tinan 2014. Nune’e mos iha tinan 2016 PDHJ foin ba dahuluk membru ba FDCH nune’e espera katak PDHJ bele hetan oportunidade hodi partisipa formasaun teknika no espesializadas tuir area servisu PDHJ nian.

Aleim de susesu durante PDHJ nia ezistencia hasoru mos dezafios oi-oin ezemplu ida maka orsamentu geral estadu ne’ebé aloka ba PDHJ ki’ik tebes. Ezemplu iha tinan 2014 orsamentu estadu PDHJ ho total \$ 1,512.000, iha tinan 2015 orsamentu hamutuk \$ 1,411,000 no tinan 2016 orsamentu geral estadu ba PDHJ hamutuk \$ 1.479.000.

Orsamento estadu ne’ebé aloka ba PDHJ la suficiente no adekuaudu ida ne’e fó inpaktu tebes ba PDHJ atu halao knaar ho independénsia no imparcialidade ho excelente hanesan instituisaun estadu ne’ebe iha poder atu supervizona no fiskaliza servisu no knaar poderes públiku sira, nune’e mos oinsa proteje no promove direitos umanus sidadaun hotu nian ho di’ak no promove governasaun di’ak tuir prinsipius governasaun di’ak.

Maske em geral kooperaun entre instituisaun sira ho PDHJ lao di’ak, maibé sei iha instituisaun balun ne’ebé seidauk komprende ho di’ak kna’ar no poder PDHJ nian, nune’e rekomendasaun balun ne’ebé PDHJ rekomenda ka karta ruma PDHJ haruka ba, sira la tau importánsia no konsiderasaun atu implementa no responde, balun mos implementa rekomendasaun husi PDHJ, maibe la fó hatene ba Provedor kona-ba implementasaun. Tanba tuir Lei 7/2004 kona-ba Estatutu PDHJ nian, órgauns kompetentes hotu ne’ebe simu rekomendasaun husi Provedor, iha dever legal atu implementa iha periodu loron 60 no informa ba Provedor kona-ba implementasaun ne’e.

Dezafiu seluk mos tuir politika VI Konstitusional hahu iha tinan 2016 hahu implementa descentralizasaun iha parte finansas ba ajensia autónoma sira maibé hanesan Provedor rekoñese katak oras ne’e dau-daun PDHJ seidauk iha rekursus umanus ne’ebé adekuaudu em termus de kuantidade no qualidade.

Iha biban kmanek ne’e hakarak hatu’o ha’u nia apresiasaun ba Parlamentu Nasional, Governu no entidades tomak nia apoiu no suporta hotu ba PDHJ durante tinan 12 nia laran. Ha’u mos hakarak agradese ba parseiru dezentvolvimentu sira ne’ebe mak servisu hamutuk durante tinan hirak ne’e, inklui parseiru sosiedade sivil no organizasaun internasional sira. Partikularmente apresia no agradese wain ba Estados Unidos Amerika liu husi Ajénsia ba Dezentvolvimentu Internasionál ninian husi Estados Unidos (USAID) ne’ebé fó apoiu ba PDHJ toó oras ne’e inklui mos USAID ninia parseirus sira ba implementasaun Management Sciences for Development, Governu Española, AUSAID, IOM no Caritas Australia iha tinan 2006-2014 fó apoiu ba PDHJ.

Agradese mos Governu Novazelandia, UNDP/OHCHR, ICC no APF, UNMIT, Embaixada Portugal iha Timor Leste, Unidade Diretos Humanos Nasaun Unidas iha Timor Leste, Uniaun Europeia, media nasional hanesan RTTL-ep, Timor Post, Diario Nasional, STL seluk-seluk tan inklui media internasional no komponente hotu-hotu ne’ebé maka ami la konsege temi iha biban kmanek ida ne’e.

Ami konsiente katak PDHJ nia servisu sei la posivel tuir ema hotu nia mehi se la konta ho imi hotu nia kontribuisaun no servisu hamutuk no ami sempre nakloke atu kontinua halo kooperasaun ho komponentes hotu. PDHJ presiza tebes ema hotu nia apoiu ho tulun hodi promove no proteje direitus humanus, hametin integridade no promove governasaun di'ak iha Timor-Leste iha tinan 12 liu ba, oras ne'e no iha futuru.

Iha biban kmanek ida ne'e mos agradese ba parte tomak ne'ebé bele marka prezensa iha fatin ida ne'e hodi selebra aniversariu PDHJ. Nune'e espesial agradese ba Ministeriu Solidaridade Sosial ne'ebé disponivel tebes hodi oferese salaun enkontru MSS hodi nune'e PDHJ bele realiza seremonia ida ne'e.

PDHJ Ho Nia Parseiru Sira Organiza Dialogu Ba Labarik Ne'ebé Separa Ho Nia Familia

Dili- Iha loron 18 Maiu 2016, PDHJ hamutuk ho Organizasaun Naun Governmental (ONG) hanesan Asia Justice and Rights (AJAR), Assosiasaun HAK, CVTL, ICRC, Fundasaun Alola no Acbit, organiza dialogu ba Timor oan hirak ne'ebé mak separa ho sira nia familia iha tempu okupasaun Indonesia iha tinan 1975 to'o 1999, ne'ebé mai vizita sira nia familia no mos hasoru malu ho entidades Estado Timor-Leste hodi hato'o sira nia sentimentu no preukupasaun durante tinan naruk nia laran sira moris iha Indonesia.



Provedor, Dr. Silverio Pinto Baptista iha nia abertura ba dialogu ne'e hateten katak, ba tinan ida ne'e, ekipa umanitaria ne'ebé kompostu husi PDHJ, Gabinete Primeiru Ministru, MSS, ICRC, CVTL, AJAR-TL, Fondasaun Alola, ACbit no Asosiasaun HAK kontinua hala'o esforsu hodi realiza reuni familia ba labarik sira separa no lakon durante tempu konfliktu politiku husi 1975-1999. Ekipa ne'e mos iha kooperasaun diak ho ekipa umanitaria iha Jakarta ne'ebé kompostu

husi KOMNAS HAM-Indonesia, AJAR Jakarta, Kontras no IKOHI, nune'e regularmente hala'o kordenasaun hodi buka no identifika labarik Timor oan ne'ebé lakon komunikasaun ho familia sira iha tempu naruk nia laran. Esforsu hirak ne'e nudar asaun umanitaria hodi sinerjia ba komitmentu Estadu Timor-Leste no Estadu Indonesia nian tuir rekomensaun balu husi Comisaun Verdade no Amizade (CVA) relasiona ho estabelesementu Komisaun Ba Buka Ema Lakon.

Provedor esplika tan katak, labarik (agora adultu ona) hamutuk nain 12 ne'ebé mak mai partisipa reuni ho familia durante loron 10 nia laran. Labarik ka benefisiariu sira ne'e maioria mai husi Municipiu Viqueque nain 8, husi Munsipiu Baucau nain 2, husi Munisipiu Lautem/ Iliomar nain 1 no husi Municipiu Ermera nian 1.

Provedor reforsa tan katak, kuaze labarik sira ne'e Militar Indonesia uza sira sai TBO (Tenaga Bantuan Operasi) no bainhira militar sira fila ba sira nia rai, sira mos lori labarik sira ne'e ba iha Indonesia nia teritoriu seim konhesementu husi familia sira iha Timor. Wainhira labarik sira ne'e to'o iha Indonesia, barak husi sira entrega ba iha Pesantren (asrama Muslimanu), nune'e labarik sira ne'e mos hetan sarani ho naran no identidade foun tuir relijiaun Muslimanu nian. Ho situasaun hirak ne'e halo defisil liutan ba parte familia sira ho sira nia oan atu halo komunikasaun ba malu. Tan ne'e iha parte familia balu hanoin sira nia oan mate ona tamba laiha informasaun serteza relasiona ho sira nia hela fatin ka paradeiru agora. Alende ne'e husi parte oan sira mos lakon identidade origem no senti nudar oan husi familia ne'ebé mos iha inserteza nia laran.

Refleta ba situasuan hirak refere, moralmente entidade Timor-Leste no Indonesia ho comunidade internasional iha obrigasaun hodi buka maneira oin-oin nune'e bele lori netik serteza ruma ba familia sira ne'ebe mak lakon oan sira durante periodu okupasaun rezime militar Indonesia atu bele hakonu lia los ne'ebe maka familia sira buka no hein hela.

Tuir relatoriu *Chega* (relatoriu finan CAVR) hetan katak, iha labarik hamutuk nain rihun haat atus lima (4500) mak militar Indonesia lori sai husi Timor no agora daudaun sei nafatin hela iha teritoria Indonesia nia laran. Esforsu atu reuni ho familia biolizia sira iha Timor, ne'e servisu boot no sai responsabilidade ba ita hotu hodi hatan ba espetasaun familia sira ne'ebe mak deseizu tebes atu hasoru nia oan sira ne'ebe mak sira hadomi.

Atividade ne'e bele realiza tanba hetan apoiu orsamentu husi Ministeriu Solidaridade Sosial liu husi fundus transferensia publiku ba ONG AJAR Timor Leste no koopera ho Komnas HAM Indonesia, PDHJ no Ajar Jakarta.

Ami fiar katak componente tomak iha nia seriadade no komitmentu atu kontinua realiza reuni familia iha etape tuir mai ho eskala ne'ebe barak no boot liutan iha futuru mai.

Orador mak iha atividade diologu ne'e mak, Prezidente Comisaun F, Parlamento Nasional, Sr. Virgilio Hornai, koalia kona-ba Perspetiva Parlamento Nasional liga ba direitu labarik lakon, Diretor Nasional Direitus Umanus no Sidadania husi Ministério Justisa, Sr. Moniz Leão, koalia

kona-ba Direitu Sidadania, Representasaun Ministério Negosiu Estrangeiru no Kooperasaun, Sr. Lizoaldo Gaspar, koalia kona-ba Komitmentu Estadu Timor-Leste relasiona ho asuntu ema lakon, no orador ikus mak Representante NKRI no KOMNAS HAM-Indonesia, Sr. Dianto Bachriadi, moderador mak Adjuntu Provedor ba area Direitus Umanus, Dr. Horacio de Almeida.

PDHJ-PNTL Asina Akordu Servisu Hamutuk

Dili, iha loron 27 Maiu 2016, Provedoria dos Direitos Humanos e Justiça (PDHJ) ho Polisia Nasional Timor-Leste (PNTL) asina akordu servisu hamutuk hodi fó formasaun iha area direitus umanus nian ba membrus PNTL sira iha Munisipiu 12 inklui Rejiaun Administrativa Espesial Oe-cusse Ambeno (RAEOA).



Provedor no Segundu Komandante PNTL assiste hela, Diretor Nasional Direitus Umanus, António M. S. da Costa Lopes no Diretor Nasional ba Sentru Formasaun Polisia, Superintendente Arquimino Ramos, asina akordu servisu hamutuk hodi fó formasaun ba Polisia sira iha Munisipiu sira

Akordu ne'e asina direita husi Diretor Nasional Direitus Umanus, Sr. António M. S. da Costa Lopes no Diretor Nasional ba Sentru Formasaun Polisia, Sr. Superintendente Arquimino Ramos.

Provedor, Dr. Silverio Pinto Baptista iha serimonia ne'e hateten katak, PDHJ iha komitmentu tomak atu servisu hamutuk duni ho Komandu PNTL liu-liu ho Sentru Formasaun Polisia atu ita kontinua la'o hamutuk hodi fó formasaun ba ita nia membrus Komandu PNTL iha Munisipiu sira

tanba intensaun Provedoria nian katak ita halo prevensaun ba kazu ne'ebé liga ho violasaun direitus umanus.

Provedor hatutan katak, dala ruma violasaun direitus umanus husi membrus PNTL sira halo tanba falta koñesimentu ba instrumentu legais sira ne'ebé mak Timor-Leste aplika no instrumentu ne'ebé mak ratifika. Tanba ne'e PDHJ hanesan pioneer ba proteje no promove direitus umanus iha dever Provedoria nian atu buka koopera ho instituisaun estadu hotu, hodi nune'e bele halo prevensaun ba violasaun direitus umanus iha rai laran.

Iha fatin hanesan, Segundu Komandante PNTL, Komisariu Faustino da Costa hateten katak, akordu ne'e halo hodi fó formasaun ba membrus PNTL liu-liu iha area direitus umanus nian.

“liu husi kooperasaun ne'e bele fó tan informasaun ba membrus sira iha terrenu para nune'e sira iha koñesimentu hodi hala'o sira nia servisu karik bele evita ona violasaun saida mak akontese tiha ona iha pasadu”, Komisariu Faustino da Costa dehan.

Programa formasaun ba membrus PNTL ne'e la'o tiha ona maibe foin mak ofisialmente halo akordu ne'e, hodi nune'e sai hanesan baze ba kooperasaun.

Atividade asina nota entendimentu ne'e, akompaña husi Provedor, Dr. Silverio Pinto Baptista no Segundu Komandante PNTL, Komisariu Faustino da Costa no asiste direitamentu husi Adjuntus Provedor nain 2, Diretor Jeral PDHJ no formadores sira husi instituisaun 2 ne'e.

PDHJ, MS no IJE Fó Treinamentu Ba Funsionariu Ministério Saúde Iha Area Governasaun Di'ak

Dili- Provedoria dos Direitos Humanos e Justiça (PDHJ) Diresaun Governasaun Di'ak servisu hamutuk ho Ministério da Saúde (MS) no Inspesaun Jeral do Estado (IJE) hodi fô treinamentu durante loron 4 hahu husi loron 11 to' o 14 Abril 2016 ba kargu Diresaun no Xefia sira iha SAMES, INS no Laboratoriu Nasional iha Ministério Saúde Munisipiu Dili.



Provedor Dr. Silverio Pinto Baptista hamutuk ho Ministra Saúde, Dra. Maria do Céu S. Pina da Costa no Inspetor Jeral Estado, Dr. Francisco de Carvalho, halo abertura ba atividade treinamentu ba kargu Diresaun no Xefias sira iha Ministério Saúde.

Dr. Silverio Pinto Baptista, Provedora, iha abertura ba treinamentu ne'e hateten katak, atividade ne'e hanesan etapa ba dalaruak nian ho nia objetivu atu hakbi'it no hasa'e koñesimentu funsionariu públiku sira ne'ebé iha kargu diresaun, xefias no profissionais saúde iha area governasaun di'ak, atu hatene konaba papel PDHJ, IJE no MS hodi garante no asegura sistema kontrolu ne'ebé efisiensia, efikasias, transparensia no akuntabilidade iha servisu administrasaun públika hodi promove governasaun di'ak.

Provedor hatutan, objetivu seluk mak atu hakbi'it koñesimentu partisipante sira konaba prinsipiu governasaun di'ak no kategoria violasaun ba governasuan di'ak atu bele prevene administrasaun la di'ak, hodi nune'e funsionariu sira ne'ebé hakna'ar a'an iha administrasun públika bele serbi ho integridade, imparcial no responsabilidade tuir lei ne'ebé regula atu bele presta servisu ne'ebé di'ak ho kualidade no profesionalismu ba comunidade sira.

Entretantu iha apresentasaun materia konaba kna'ar PDHJ nian, Provedor esprika konaba kompetensia PDHJ atu halo investigasaun, monitorizasaun no promosaun no edukasaun.

Provedor mos esplika klean liu tan konaba servisu PDHJ atu simu kesar husi sidadaun hotu, no halo investigasaun no rezultadu investigasaun sei rekomenda ba Ministério relevante, tanba tuir estatutu Provedoria nian sei hato'o deit rekomendasaun no haruka ba Ministério ka Instituisaun relevante, atu foti asaun hodi implementa rekomendasaun husi PDHJ atu bele hadia failansu ne'ebé akontese hodi promove governasaun di'ak.

Iha fatin hanesan, Ministra da Saúde. Dra. Maria do Céu S. Pina da Costa hateten mos katak, atividade ne'e hanesan kontinuasaun akordu ne'ebé asina entre Instituisaun PDHJ ho IJE atu kontinua treinamentu ba Ministériu Saúde ninia kargu diresaun no xefias sira.

Treinamentu ba dalaruak ne'e, realiza ba Instituisaun 3 iha Ministériu Saúde mak hanesan Instituisaun Nasional Saúde (INS), Laboratoriu Nasional no SAMES rasik, tanba instituisuan 3 ne'e hanesan instituisaun ne'ebé autonomo ona administrativamente finanseiru no patrimoniun rasik entaun persiza iha konhesimentu diak ba sistema hotu liu-liu konaba prinsipu boa governasaun.

Matéria sira ne'ebé fasilitadór sira hato'o durante treinamentu mak, kna'ar PDHJ, Prinsípiu Báziku Governasaun Di'ak no Categoria Violaasaun Governasaun Di'ak, Papél Inspesaun Jerál Estadu, Importansia Aplikasaun Kontrolu Internu, Dezempeñu Dedikasaun no Integridade. Nune'e mós materia kona-ba Papél GIFA-MS nian.

Treinamentu conjunta entre PDHJ, MS no IJE ho topiku “Kapasita no Hasa'e Koñesimentu Funksionalismu Públiku iha área Saúde hodi promove Governasaun Di'ak” hala'o iha salaun enkontru SAMES- Dili.

Kargu Diresaun no Xefia Iha PDHJ Hamutuk 24 Simu Tomada de Posse

Dili - Iha loron 15 Abril 2016, Representante Presidente Komisaun Funsan Públika, Komisario Dr. Jose Telo akompanha husi Provedor Dr. Silverio Pinto Baptista fó tomada de posse ba kargu Diresaun no Xefia sira iha Instituisaun Provedoria dos Direitos Humanos e Justiça (PDHJ) hamutuk 24 ne'ebé kompostu husi Diretor Jeral 1, Diretor Nasional 4, Diretor Delegasaun Territorial 4, Inspetor 1, no Xefia Departamentus 14.



Kargu Diresaun no Xefia sira halo juramentu wainhira simu tomada de posse

Provedor, Dr. Silverio Pinto Baptista iha nia diskursu husu ba emposados sira ne'ebé foin simu tomada de posse atu servisu ho responsabilidade hanesan funsionariu públiku, husu mos atu hadok a'an husi kores oi-oín ne'ebé iha sosieadade nia let liu-liu ba politika, no mos husu atu servisu ho koperasaun, no konsulta ba malu entre funsionariu sira no bele mos konsulta ho superior sira, wainhira hasoru difikuldades iha servisu laran.

Provedor husu nafatin ba emposados sira katak, kargu ne'ebé asumi laos gava a'an, maibe tenki dedika a'an atu servisu ho diak liu tan hodi servi ita nia comunidade ne'ebé buka lia los no justisa.

Iha oportunidade ne'e mos, Provedor hateten ba familia husi emposados sira katak, natureza servisu iha Instituisaun Provedoria la hanesan ho Instituisaun sira seluk, dala ruma iha tempu feriadu mos Instituisaun persiza hela sira atu halo servisu.

Aliende ne'e mos, Provedor agradese ba funsionariu sira ne'ebé asumi tiha ona kargu Diresaun no Xefia iha tinan kotuk atu servisu hamutuk nafatin hodi lori Instituisaun PDHJ hanesan Instituisaun independente ne'ebé temi iha Konstituisaun RDTL, hodi nune'e bele servi diak liu tan comunidade ne'ebé mukt ba justisa no lia los.

Iha fatin hanesan, representante Presidente Komisaun Funsan Públika, Komisario Dr. Jose Telo iha nia diskursu lori Komisaun Funsan Públika nia naran hakarak kongratula funsionariu PDHJ ne'ebé hetan konfiansa husi superior maximu hodi asumu kargu Diresaun no Xefia hirak ne'e. nune'e bele dezenpenha funsaun PDHJ nian, atu asegura direitus umanus no boa governasaun iha estadu Timor-Leste, liu-liu ba funsinariu publiku, imi (emposados *Red*) tenki servi ho diak no hatudu profesionalismu, atu oinsa bele hetan produktividade ne'ebé efisiensia, efikasias no kualidade.

Iha serimonia tomada de posse ba kargu Diresaun no Xefia sira partisipa husi Ministro de Estado Coordenador dos Assuntos da Administração do Estado e da Justiça e Ministro da Administração Estatal, Dr. Deonísio Babo Soares, Komisariu Comissão Anti-Corrupção, Dr. Aderito Pinto Tilman, Inspetor Jeral Estado, Dr. Francisco de Carvalho, Provedor sesante Dr. Sebastião Dias Ximenes, Adjunto Provedor sesante Dr. Rui Pereira dos Santos, familia husi emposados sira no funsionariu PDHJ.

Serimonia tomada de posse ne'e mos, halo juramentu ba emposados sira ne'ebé deriji husi Diretor Jeral PDHJ, Sr. Aureo J. A. Savio no akompanha husi Padre Kapilão PNTL, Nelinho Americo Ferreira Soares.

Ami Pronto Atu Atende !!!

Wainhira ita boot hakarak hetan informasaun konaba atividades PDHJ nian no hakarak hatu'o keixa konaba Violaun Direitus Umanus ka violaun Governasaun Dia'k, ita boot sira bele hatama iha kaixa keixa ne'ebe iha kada Sede Munisipiu no Postu Administrativu, liu husi telefone nomos bele mai diretamente iha sede PDHJ.

Lista informasaun mak hanesan tuir mai:

Sede Nasional Dili

Nu.Tel. : 333 1184 ou + 670 7730 4262
Direasaun : Rua de Caicoli, Dili

Sede Regional Baucau

Nu. Tel. : + 670 7713 1984
Direasaun : Rua de Watulete-Betulale Suku Tirilolo-
Baucau

Sede Regional Manufahi

Nu. Tel. : +670 7772 0220
Direasaun : Rua de Postu Pousada, Suku Letefoho

Sede Regional Maliana

Nu. Tel. : +670 7732 6206
Direasaun : Rua de Malibata, Suku Holsa

Sede Regional Oe-cusse

Nu. Tel. : +670 7725 4054
Direasaun : Rua de Santa Rosa, Suku Costa

Web-site : www.pdhj.tl
Facebook : PDHJ Timor Leste

Responsabilidade jeral : Dr. Silverio Pinto Baptista, Provedor, Dr. Horacio de Almeida, Adjunto Provedor ba área Direitus Umanus, Dra. Jesuina M. F. Gomes, MPA, Adjunta Provedor ba área Governasaun Di'ak, Aureo. J. A. Savio, Diretor Jeral.

Responsabilidade ba área servisu: Ludovina das Neves Santana, Diretora Administrasaun no Finansas (DAF), António M. Soares da Costa Lopes, Diretor Direitus Umanus (DU), José M. Ferreira, Diretor Governasaun Dia'k (BG), Silvino Saldanha Pereira, Diretor Asistensia Pública (DAP).

Koordenador redasaun: Moises Nazario Pereira. Hakerek nain no dokumentasaun : Jose Tefa no Moises Nazario Pereira.

Edifisiu: Rua de Caicoli Dili-Timor Leste

Foto Atividades



PDHJ hamutuk ho parseiru servisu organiza Timor oan hirak ne'ebé mak separa ho sira nia familia iha tempu okupasaun Indonesia iha tinan 1975 to'o 1999, hasoru malu ho Prezidente da Repúblika no Primeiru Ministerio



Kargu Diresaun no Xefia sira halo juramentu no foto hamutuk depois tomada de posse



Provedor, Dr. Silverio Pinto Baptista ho Segundu Komandante PNTL, Komisariu Faustino da Costa, akompaña Diretor Nasional Direitus Umanus, António M. S. da Costa Lopes no Diretor Nasional ba Sentru Formasaun Polisia, Superintendente Arquimino Ramos, asina akordu servisu hamutuk hodi fó formasaun ba membrus polisia sira iha Munisipius.



PDHJ Realiza Enkontru Públiku Ho Autoridade no Komunidade Iha Rejiaun Administrativa Espesial Oe-cusse Ambeno (RAEOA)